

В ПЯТОК ВЕЧЕРА ВО СВЕТИЛЬНИЧНОЕ,

по обычном стихословии, на Господи воззвах, поставим стихов 10, и поем стихиры, самогласен дне, дважды. Глас 5:

Приидите вернии, / делаим во свете дела Божия, / яко во дни благообразно ходим, / всякое неправедное списание / от себе ближняго отыдем, / не полагающе претыкания сему в соблазн. / Оставим плоти сладострастие, / возрастим души дарования, / дадим требующим хлеб, / и приступим Христу / в покаянии вопиюще: / Боже наш, помилуй нас.

Таже поем и четыре мученичны Октоиха, прилучившагося гласа.

Таже самогласны 4, святого Феодора. Глас 2:

Приидите мучениколюбцы вси, / духовно возвеселимся, и торжествуим: / днесь бо предлагает трапезу тайную мученик Феодор, / веселящую празднлюбцев нас, / еже вопити к нему: / радуйся стратотерпче непобедимый, / прещения мучителей на земли разоривый. / Радуйся, бренное тело за Христа отдавый мукам. / Радуйся, в различных бедах, / искусный воин явивыйся небеснаго воинства. / Темже молим тя мучеников украшение, молися о душах наших.

Богодарованную благодать чудес твоих, / мучениче Феодоре, / всем простираеши, верою к тебе притекающим, / еюже хвалим тя, глаголюще: / плененныя избавляеши, исцеляеши болящия, нищия обогащаеши: / и спасаеши плавающая, / суетное течение удерживаеши рабов, / и тщеты явление твориши украдающим страдальче, / и воины наказуеши восхищения огребатися, / младенцем даруеши милостивно прошения, / теплый обретаешися предстатель творящим твою священную память. / С нимиже и нас страдальче священнейший, воспевающим твоё мучение, / проси у Христа велию милость.

Дар Божий превышший показался еси мучениче Феодоре: / зане и по кончине яко жив притекающим даеши прошения. / Темже сыну восхищенну жены иногда, / плененну иноверными воины, / представши вдовица слезами храм твой мочаше: / ты же яко милостив на коне белом нашед, / сея отрока представил еси невидимо: / и по сем и с сим действуяй чудесы, / не престал еси. / Но моли Христа Бога, спастися душам нашим.

Божественных даров тезоименита ты чту, / треблаженне Феодоре: / света бо Божественнаго незаходимое светило явлейся, / уяснил еси страданьми твоими всю тварь: / и огня сильнейший явился, / пламень угасил еси, и лествиаго змия главу сокрушил еси. / Темже во страданиях твоих Христос приклонився, / енча божественную главу твою великомучениче страдальче, / яко имеяй дерзновение к Богу, / прилежно молися о душах наших.

Слава, глас 6:

Сосуда употребив враг сооступника мучителя, / умышлением лютым, / постом очищающияся люди благочестивыя, / от скверных жертв, /

оскверненными брашны окушашеся осквернити: / но ты онаго ухищрение мудрейшим разрушил еси умышлением, / во сне предстал еси тогдашнему архиерею, / и глубокое разума открывая, / и безместное начинание являя, / и тебе убо благодарственная приносяще, / Спаса напишем, летное воспоминание бывшего чудесе творяще: / и прочее молящеся, от умышлений лукаваго невредимым спастися, / к Богу твоими молитвами мучениче Феодоре.

И ныне, Богородичен гласа. Вход без Евангелиа.

Кто Тебе не ублажит, Пресвятая Дево; / кто ли не воспоеет Твоего Пречистаго Рождества; / безлетно бо от Отца Возсиявый Сын Единородный, / Тойже от Тебе, Чистыя, пройде, / неизреченно воплоща: / естеством Бог сый, / и естеством быв Человек нас ради, / не во двою лицу Разделяемый, / но во Двою Естеству / неслитно Познаваемый. / Того моли, Чистая, Всеблаженная, / помиловатися душам нашим.

Свете тихий:

Прокимен, псалом 19. Глас 5: Услышит тя Господь в день печали.

Стих: Защитит тя имя Бога Иаковля.

Бытия чтение. [Глава 2, ст. 20 – 25. Глава 3, ст. 1 – 20.]

Нарече Адам имена всем скотом, и всем птицам небесным, и всем зверем земным, Адаму же не обретешя помощник подобный ему. И наложи Бог изступление на Адама, и успе: и взя едино от ребр его, и исполни плотию вместо его. И созда Господь Бог ребро, еже взя от Адама, в жену, и приведе ю ко Адаму. И рече Адам: се ныне кость от костей моих, и плоть от плоти моя: сия наречется жена, яко от мужа своего взята бысть сия. Сего ради оставит человек отца своего и мать, и прилепится к жене своей, и будета два в плоть едину. И беста оба нага, Адам же и жена его, и не стыдятся. Змий же бе мудрейший всех зверей сущих на земли, ихже сотвори Господь Бог. И рече змий жене: что яко рече Бог: да не ясте от всякаго древа райскаго? И рече жена змию: от всякаго древа райскаго ясти будем: от плода же древа, еже есть посреде рая, рече Бог, да не ясте от него, ниже прикоснетесь ему, да не умрете. И рече змий жене: не смертию умрете. Ведяше бо Бог, яко воньже аще день снете от него, отверзутся очи ваши, и будете яко бози, ведяще доброе и лукавое. И виде жена, яко добро древо в снедь, и яко угодно очима видети, и красно есть, еже разумети: и взявши от плода его, яде: и даде мужу своему с собою, и ядоста. И отверзошася очи обема, и разумеша, яко нази беша, и сшиста листовие смоковное, и сотвориша себе препоясания. И услышаша глас Господа Бога, ходяща в рай по полудни: и скрыстася Адам же и жена его от лица Господа Бога посреде древа райскаго. И призва Господь Бог Адама, и рече ему: Адаме, где еси? И рече ему: глас слышах Тебе ходяща в рай, и убояхся яко наг есмь, и скрыхся. И рече ему Бог: кто возвести тебе, яко наг еси, аще не бы от древа, егоже заповедах тебе, сего единого не ясти, от него ял еси? И рече Адам: жена, юже дал еси со мною, та ми даде от древа, и ядох. И рече Господь Бог жене: что сие сотворила еси? И рече жена: змий прельсти мя, и ядох. И рече Господь Бог змию: яко сотворил еси сие, проклят ты от [паче] всех скотов,

и от всех зверей земных: на персех твоих и чреве ходити будеши, и землю снеси вся дни живота твоего. И вражду положу между тобою, и между женою, и между семенем твоим, и между семенем тоя: той твою блюсти будет [евр: сотрет] главу, и ты блюсти будеши его пяту. И жене рече: умножая умножу печали твоя, и въздыхания твоя, в болезнех родиши чада, и к мужу твоему обращение твое, и той тобою обладати будет. И Адаму рече: яко послушал еси гласа жены твоея, и ял еси от древа, егоже заповедах тебе сего единого не ясти, от него ял еси: проклята земля в делех твоих, в печалех снеси тую вся дни живота твоего. Терния и волчцы возрастит тебе, и снеси траву сельную. В поте лица твоего снеси хлеб твой, дондеже возвратишия в землю, от неяже взят еси: яко земля еси, и в землю отыдеши. И нарече Адам имя жене своей Жизнь, яко та мати всех живущих.

Прокимен, псалом 20, глас 6: Вознесися Господи, силою Твоею, воспоем и поем силы Твоя.

Стих: Господи, силою Твоею возвеселится царь.

Притчей чтение. [Глава 3, ст. 19 – 34.]

Бог премудростию основа землю, уготова же небеса разумом: В чувстве Его бездны разверзошася, облацы же источиша росу. Сыне да не преминеши, соблюди же мой совет, и мысль: Да жива будет душа твоя, и благодать будет на твоей выи: [будет же исцеление плотем твоим, и уврачевание костем твоим:] Да ходиши надеяся в мире во всех путех твоих, нога же твоя не поткнется, Аще бо сядеши, безбоязнен будеши, аще же поспиши сладостно поспиши: И не убоишия страха нашедшаго, ниже устремления нечестивых находящаго. Господь бо будет на всех путех твоих, и утвердит ногу твою, да не поползнешия. Не отрецыся благотворити требующему, егда имать рука твоя помогати. Не рцы: отшед возвратися, и завтра дам, сильну ти сущу благотворити: не веси бо что породит находящий день. Не соплетай на друга твоего зла, пришельца суща и уповающа на тя. Не враждуй на человека туне, да не что на тя содеет злое. Не стяжи злых мужей поношения, не возревнуй путем их. Нечист бо пред Господем всяк законопреступник и с праведными не сочетается. Клятва Господня в домех нечестивых: двory же праведных благословляются. Господь гордым противится: смиренным же дает благодать.

Таже, Да исправится молитва моя:

И прочее последование преждесвященных.

По заамвонной молитве

поем настоящий молебный канон святого Феодора. Предложши же коливо, глаголем псалом 142: Господи, услыши молитву мою: **Таже, Бог Господь, и явися нам: И абие тропарь, глас 2:**

Велия веры исправления, / во источнице пламене, / яко на воде упокоения, / святой мученик Феодор радовашеся: / огнем бо всеожжегся, яко хлеб сладкий Троице принесся. / Того молитвами / Христе Боже спаси души наша.

Слава, тойже.

И ныне, Богородичен:

Вся паче смысла, / вся преславная Твоя Богородице таинства, / чистоте запечатанной, и девству храниму, / Мати позналася еси неложна Бога рождши истиннаго: / Того моли спастися душам нашим.

И абие псалом 50.

Таже настоящий канон, глас 8: Творение Иоанна Дамаскина, егоже краестроичие: Божиих тя пою даров тезоимените.

Песнь 1.

Ирмос: Воду прошед яко сушу / и Египетскаго зла избежав, / израильтянин вопияше: / Избавителю и Богу нашему поим.

Божия тя рачителя Феодоре ведый и любовию неизбежною твоею запенся, душу же и тело, и словеса похвал возлагаю.

Писашеся повеление богомерзкое, жертву идолом, а не Живому Богу приносить: но приведен был еси, не пожрай страсотерпче, Богу же имый приведен быти.

Слава: Рачением Божественным пригвожден, Бога Вышняго Сыну Единородному, Феодоре мучениче ввоинился еси, и почестей не погрешил еси.

Богородичен: Чини Тя ангелов и человек безвестная Мати восхваляют непрестанно: Содетеля бо сих, яко Младенца во объятиих Твоих носила еси.

Песнь 3.

Ирмос: Ты еси утверждение притекающих к Тебе, Господи: / Ты еси свет омраченных, / и поет Тя дух мой.

Пение из устен моих, и из болезненной души мольбу приношу, юже ущедрю страсотерпче Феодоре.

Плоть покорил еси Самодержцу, славне мучениче, уму, и обоими угождаеши Создавшему.

Слава: Стал еси на судищи мучительском, Христа Царя богословя: жрети бо скверным отрелся еси Феодоре.

Богородичен: Тя вси стяжанием прибежище и стену присно христиане: Тя славословим немолчно безвестная.

Песнь 4.

Ирмос: Услышах, Господи, / смотрения Твоего таинство, / разумех дела Твоя / и прославих Твое Божество.

Таин Божественных вкусив, в разуме мучениче Феодоре, непостыдную проповедь Божия рождения исповедал еси.

Страстное божество непщеваху, страстем служащий, ихже духом изблещил еси, страдальче Феодоре просвещаемь.

Слава: Избавителя молитвою, тебе воспевающим блаженне Феодоре, от различных обстояний и страстей быти молим.

Богородичен: Клас возрастившая животворящий, неоранная ниво, подающий мирови жизнь, Богородице, спаси поющия Тя.

Песнь 5.

Ирмос: Утренююще вопием Ти, Господи, / спаси ны, / Ты бо еси Бог наш, / разве бо Тебе иного не знаем.

Любите возлюбившаго Господа, возглашал еси страдальче Феодоре, страждущим с тобою мучеником.

Яко ревностию страсотерпче разжизаяся сердцем, богиню лжеименитую с требищем попалил еси.

Слава: Силою непобедимую Феодоре страсотерпче, варварскую дерзость, и моя страсти погуби.

Богородичен: Деву по рождестве поем Тя Богородице: Ты бо Бога Слова плотию мирови родила еси.

Песнь 6.

Ирмос: Очисти мя Спасе, / многа бо беззакония моя, / и из глубины зол возведи, молюся: / к Тебе бо возопих, и услыши мя, / Боже спасения моего.

Коль слабое, коль немощное, богов суетных шатание! На отмщение свое, человеком моляшеся в стоянии побеждаемое, неложных мучеников проповедающих истину. **[Дважды.]**

Слава: Укрепився силою Божиею, мучеников славо Феодоре, муки злочестивых, младенец стреляния зрел еси блаженне, вечнующее будущих предзря.

Богородичен: Да избавимся от лютых прегрешений молитвами Твоими Богородительнице Чистая, и да улещим Всечистая Божественнаго осияния, из Тебе неизреченно воплотившагося Сына Божия.

Кондак, глас 8:

Веру Христову яко щит внутрь приим в сердца твоем, / противныя силы попрали еси многострадальче, / и венцем небесным венчался еси вечно Феодоре, / яко непобедимый.

Песнь 7.

Ирмос: От Иудеи дошедше отроцы, / в Вавилоне иногда / верую Троицкою пламень пещный попраша, поюще: / отцев Боже, благословен еси.

Уранен был еси телом, за ураненнаго Слова плотию нас ради, и Сему благодарственно веселяся возопил еси, страстотерпче Феодоре: отец наших Боже благословен еси.

Яко во гробе положишься, и волею запечатлешься Избавителю всех, в темнице запечатленной вселился еси, вопия страстотерпче Феодоре: отец наших Боже благословен еси.

Умерщвлен быв, и страсти плотския произволением оттряс, не снеси страстотерпче, но любовию Божественною питаясь пел еси: отец наших Боже благословен еси.

Слава: В темнице страстотерпче, якоже в пещи юноши иногда, Един нетленный Троицы тебе укрепляет, виден быв, вопиющая: отец наших Боже благословен еси.

Богородичен: Наше спасение, якоже восхотел еси Спасе устроить, во утробу Девы вселился еси, Юже миру предстательницу показал еси: отец наших Боже благословен еси.

Песнь 8.

Ирмос: Седмерицею пещь халдейский мучитель / богочестивым неистовно разжже, / силою же лучшею спасены сия видево, / Творцу и Избавителю вопияше: / отроцы благословите, / священники воспойте, / людие превозносите во вся веки.

Ослеплен умом, беззаконных начальник, богочестиву тебе нечестивно претяше: что все на человека нуждею умерша, безумне, возложил еси надежду? Но ты возопил еси: отроцы благословите, священники воспойте, людие превозносите во вся веки.

Яко смысленный и премудрый строитель благодати, данную тебе от Бога благодатию, возопил еси Феодоре, повелевающему нечестивно: сей студ мне и поющим буди: отроцы благословите, священники воспойте, людие превозносите во вся веки.

Слава: Юношески подвизался еси, дерзостно изблещил еси: что безумствуещи, мучителю взывал еси, повелевая тварем служити ложно, оставльшим Создавшаго? Но аз воспеваю: отроцы благословите, священники воспойте, людие превозносите во вся веки.

Богородичен: Плотскими изображеньми, и различными ганани, и знаменательными и образительными изреченьми, Твое предвещаху богоглаголивии Рождество, преестественное и чудное Дево: темже Тя веселящися благочестно восхваляем, Христа превозносяще во вся веки.

Песнь 9.

Ирмос: Тя Неискусобрачную Матерь Бога Вышняго: / Тя паче ума рождшую / словом воистинну Бога, / вышшую пречистых сил, / немолчными славословлении величаем.

Вещество мучения твоего, Божие Феодоре желание. Темже ти и вещество бысть вещественному телу огню: имже к Божественному радуяся огню изшел еси, стратотерпче угодниче Божий Феодоре.

Мучениче всечестне, попалив, не попалился еси: ты бо прелесть попалил еси, Богу же предстоиши живой, и в Нем мученически веселяся стратотерпче, и угодниче Феодоре.

Слава: Единого Тя знаем Христа, единого от Троицы, во двою совершенну естеству, люди Твоя спаси сия, яже стяжал еси честною Твоею кровию, Феодора стратотерпца молитвами.

Богородичен: Тя невидимаго Бога носившую объятии, на небесех воспеваемого от всея силы: и Тобою нам даруемое выну спасение во обстоянии величаем.

Ирмос: Тя Неискусобрачную Матерь Бога Вышняго: / Тя паче ума рождшую / словом воистинну Бога, / вышшую пречистых сил, / немолчными славословлении величаем.

И абие, Трисвятое. И тропарь святого:

Велия веры исправления, / во источнице пламене, / яко на воде упокоения, / святой мученик Феодор радовашеся: / огнем бо всесожжегся, яко хлеб сладкий Троице принесесе. / Того молитвами / Христе Боже спаси души наша.

Слава, тойже.

Кондак, глас 8:

Веру Христову яко щит внутрь приим в сердца твоем, / противныя силы попрал еси многострадальче, / и венцем небесным венчался еси вечно Феодоре, / яко непобедимый.

И ныне, Богородичен, глас тойже:

Якоже предстательство вси, и державное заступление, / прегрешшии стяжахом Всечистая, / Твою теплую помощь Дево Мати Марие, / христиан спасение. Тем не престай о нас молящи Спаса, / дароватися прощению.

И бывает благословение колива. Таже, Буди имя Господне: и Благословлю Господа: И дается преломление от иереа. И отпуст.

А идеже не быти преждесвященной, кончаем часы сице. По Ослаби, остави: И по конечных поклонех глаголем Трисвятое. По Отче наш: Господи помилуй, 12. Таже молитва, Всесвятая Троице: И начинаем Вечерню: Приидите поклонимся: трижды. Псалом 103. Кафисма. И поем на Господи воззвах, стихиры на 6. Мученичны 3, во Октоихе гласа, иже на ряду: И святому Феодору, 3, Слава, Феодору: Сосуда употребив: И ныне, Богородичен, гласа рядоваго. Свете тихий: без входа. Чтение. На стиховне Триоди самогласен дне дважды, и мученичен, глас 5: Благословено воинство: Слава, Феодору, глас 2: Божественных даров: Писан в стихирах. И ныне, Богородичен: Все упование: Ныне отпускаеши: Трисвятое. По Отче наш: Тропарь: Велия веры: Слава, и ныне, Богородичен: Вся паче смысла: Таже ектения, Помилуй нас Боже: И поклоны, 3. И облачится священник в багряный фелонь, и начинает: Благословен Бог наш: И мы глаголем псалом 142: Господи услыши молитву: И прочее якоже указано прежде. Канон на 4. И по совершении канона, Вместо: Достойно есть: Поем ирмос 9 песни: Тя Неискусобрачную: Таже Трисвятое. По Отче наш: Тропарь: Велия веры: Слава, кондак: Веру Христову: И ныне, Богородичен: Якоже предстательство: Таже молитву над коливом, благословение колива. Посем, Буди имя Господне: и Благословлю Господа: И отпуст. И входим в трапезу, и вкушаем вина и елеа, ради святаго. Сие прияхом в лавре преподобнаго отца нашего Саввы, и киновии преподобнаго Великаго Евфимия: но не творим сего ныне за честность дне. Обаче ядим варение с сливами, без масла и армеа: произволяющи же ядят сухоядение, якоже и в среду.

Подобает ведати, яко во всех пятках святых и великих Четырдесятниц, на Вечернях и Повечериях поклонов не творим, токмо воображенныя в преждеосвященной, еже есть по Да исправится: поклоны 3. По входе Святых Даров, поклоны 3. И на Буди имя Господне, поклоны 3.

Повечерия же поем великая, на нихже поем покойныя каноны настоящего гласа, в гробнице.

Каноны же в Минеи настоящиа субботы и Недели поем, егда изволит еклисиарх: един убо поем в Повечерии пятка, другой же канон поем в Повечерии Недели.

Тако творим во всех пятках, в вечер святых и великих Четырдесятниц.

В СУББОТУ ПЕРВУЮ СВЯТЫХ ПОСТОВ, НА УТРЕНИ

**по шестопсалмию, поем Бог Господь, на глас 2, и глаголем тропарь святого
Феодора, дважды:**

**Велия веры исправления, / во источнице пламене, / яко на воде упокоения,
/ святой мученик Феодор радовашеся: / огнем бо всеожжегся, яко хлеб
сладкий Троице принесесеся. / Того молитвами / Христе Боже спаси души наша.**

Слава, и ныне, Богородичен единожды:

**Вся паче смысла, / вся преславная Твоя Богородице таинства, / чистоте
запечатанной, и девству храниму, / Мати позналася еси неложна Бога рождши
истиннаго: / Того моли спастися душам нашим.**

**И обычное стихословие. По 1-м же стихословию поем седальны мученичны,
Осмогласника, случившагося гласа, с Богородичным. По 2-м же стихословию
поем настояция седальны святого Феодора.**

Глас 3.

Подобен: Божия веры:

**Кипя веры православием, / прелесть угасил еси злославия, / упразднил
идольское безбожие: / и всеожжение божественное быв, / чудодействию
орошаеши концы мучениче преславне, / Христа Бога моли, / даровати нам
велию милость.**

Другий седален святого, подобен:

**Божественный дар, ты ко спасению всей даде вселенней, / в
страдальчествах укрепивый ты Господь, / душевныя наша болезни исцеляя, / и
телесныя страсти побеждая, / мучениче Феодоре, / Христа Бога моли, даровати
нам велию милость.**

Богородичен, подобен:

**Невместимаго Бога, во утробе Твоей Дево Пречистая носившая, / прежде
век от Отца нетленно возсиявшаго, / Слова Ипостаснаго, и Сына
единосущнаго, / Сего моли с пророки / и мученики, преподобными, постники и
праведными, / даровати нам разрешение прегрешений.**

**Таже чтем мучение святого. Таже псалом 50. И канон святого обители со
ирмосы на 6. И святого Феодора на 8: Стихословим же и Господеви поем.**

**Канон, егоже краестрочие: Тирон преславный, слава первой субботе. В первых
же тропарех канона, иное краегранесие. Канон, творение Иоанна, митрополита
Евхаитскаго, глас 4.**

Песнь 1.

Ирмос: Отверзу уста моя, / и наполнятся Духа, / и слово отрыгну Царице Матери, / и явлюся светло торжествуя, / и воспою радуясь Тоя чудеса.

Всех превышший, Тя неизреченно Родившую, всех предположи вышшую Своих избранных. Темже днесь сего венчника поюще Всепетая, Тебе предначинаем.

Великаго в мученицех, страдальца пресветлаго, именитаго, и преславнаго в чудесех, от конец земли и до конец знаменитаго, песньми воспою Феодора.

День веселый в скорбех возсия, и сетование сих уясни, предпразднственная предпутя издалеча, просиявша благодатию божественнаго мученика.

Кропит очищения Церковь, кровьми святое заклание, еже прият пожренный и в жертву приятый, страдальчествовавшего Божественныя ради славы его.

Богородичен: Красно аще и незрело, еже праздновати узаконися: украсившая бо вся Владычица, и ныне показа сея памяти приобщающихся предбедствующему кровию.

Иный канон, тогоже Евхаитскаго, глас 6.

Песнь 1.

Ирмос: Яко по суху пешешествовав Израиль, / по бездне стопами, / гонителя фараона / видя потопляема, / Богу / победную песнь / поим, вопияше.

Чудный во святых воистинну Боже, во мне удиви милости Твоя Христе, слово ми даруя, яко да чудная восхваляю Твоего мученика.

Твердое в страдальчестве, и терпеливое в болезнех показал еси страстотерпче Христов: скорое же паки на нас помощи являя твоя, Феодоре.

Слава: Благочестивую отец веру, от души его мучитель отревая зле, нечестивый совет Богу приразив, восхоте присно ити.

Богородичен: Богоречивых проречения древле мужей, на Тебе исполнишася Мати Дево яве, яко Бога рождшая истиннаго, и Человека истиннаго, паче естества и ужасно.

Катавасия: Отверзу уста моя, / и наполнятся Духа, / и слово отрыгну Царице Матери, / и явлюся светло торжествуя, / и воспою радуясь Тоя чудеса.

Песнь 3.

Ирмос: Твоя песнословцы Богородице, / живой и независтный источнике, / лик себе совокупльшия духовно утверди, / в Божественней Твоей славе, / венцев славы сподоби.

Видети день Сына Твоего, желающе христоименитии людие, во образ Сего Владычице, Тому ныне предпразднствуют, Тебе носяще показание, и славнаго страстотерпца Твоего.

Побеждают всякими образы лучшая: великий бо во страдальцех в веселие измени временную скорбь, святаго зельное поста обратив во ослабление.

Свойственный и подобный тебе дар, ибо от своих страдальче: ихже бо сам вселил еси в сей частице твоей, обрадованно дары тебе похвал приносим.

Добрейшее основание положил еси, твоими изрядствы изрядне, зверя всегубительна, огнем и убийством дышуща, низложив яко бездельна преестественною доблестию.

Неистовствовав новый отступник, по равному люте древнему, жертвы брашном якоже ядом смеси: но ложный окаянник премудрися мучеником.

Богородичен: **Исполнися** убо вся Дево, знати Господа земля, из Тебе миру явльшася: но божественным мучеником благодать многая, утвердившим самими собою истину.

Иный.

Ирмос: **Несть свят, якоже Ты / Господи Боже мой, / вознесый рог верных Твоих, Блаже, / и утвердивый нас на камени / исповедания Твоего.**

Первее в Евины уши пошептавый лестно, и Адама тоуже прельстивый лестно, той и ныне яд злобы к лести излия.

Лестца имяше на него, питаше неистовство противу правоживущим, время взыскаше правое, вонже мерзость сотворити поучашеся пребеззаконнейший.

Слава: **Дней** начаток святых наста постов: в нихже всякий христианин самаго себе воздержанием многим очистив, всех ошаяся.

Богородичен: **Надеждо** миру державная, покрове и предстательство Всесвятая Дево, не презри Благая моления рабов, от любве Тя присно ублажающих.

Катавасия: **Твоя** песнословцы Богородице, / **живый и независтный источниче,** / **лик себе совокупльшия духовно утверди,** / **в Божественней Твоей славе,** / **венцев славы сподоби.**

Седален, глас 8:

Подобен: Премудрости слово:

Божественное всеоружие восприим, / и идолов леств низложив, / ангелы воздвигл еси восхваляти подвиги твоя: / божественным бо желанием ум распалив, / смерть во огни доблественно презрел еси. / Темже именоносно просящим тя / даруй божественныя дары, / исцелений подаяния страстотерпче Феодоре: / молися Христу Богу, согрешений оставление даровати, / празднующим любовию святую память твою.

Слава, подобен:

Максимиановыми ласканьми не уклонився, / Христовыми же словесы мужествовав, / идольское капище во огни испепелил еси, / страдальчески победив добре сопротивника, / пророчески прешел еси огонь, / якоже в воде. Темже достойно воздаяние подвигов, / источаеши исцеления, страсотерпче Феодоре: / молися Христу Богу, / прегрешений оставлению дароватися, / празднующим любовию святую память твою.

И ныне, Богородичен, Подобен:

Яко всенепорочная Невеста Творца, / яко неискусомужная Мати Избавителя, / яко приятелище сущи Вышняго Всепетая, / беззакония мя суща скверное жилище, / и в разуме бывша бесов игралище: / потщися и сих злодействия мя избавити, / светлое жилище добродетелию стяжавшая, / светоприемнице нетленная: / разжени облак страстей, / и горния светлости сподоби, / и света невечерняго молитвами Твоими.

Песнь 4.

Ирмос: Седяй в славе, / на престоле Божества, / во облаце легце прииде / Иисус Пребожественный, / нетленною дланию, / и спасе зовущия: / слава Христе силе Твоей.

О новаго и преславнаго смешения же и растворения! Девству рождество соедини родивыйся Богочеловек: сетованным же днем веселие, Своего почитая страдальца вмеси.

Виждь, како Христа любяше, Христови воинствуяй, враги бо Сего ревностию и огнем погуби, и себе конечное добрую и приятную Ему жертву усердно отдаде.

Победоносный от страдальчеств доблий разреши, дерзновенно глаголя, и презрением мучений зрители удивив, и быв всей твари новое и преславное позорище.

Кость убо не сокрушися Бога и Владыки моего, о долготерпения, и по умерщвлении страждуща! Воина же его огонь прием, и коло устыдеса, умершу прикоснутися.

Богородичен: Соумершии Владыце, живота служители, и сооставшии живут у Него ныне вечно: и Сыну Матерь прославляют благословяще Отца, Сына и Духа Святаго.

Иный.

Ирмос: Христос моя Сила, / Бог и Господь, / честная Церковь / боголепно поет зывающе, / от смысла чиста / о Господе празднующи.

Совет совещаает нечестивейший, зрите, яко воистинну есть страшно: разуме бо окаянный мерзкими брашны, люди Христовы осквернити.

В дело приведе совет беззаконный: возбранити бо повелев чистых ядений брашно, и предложити, яже он оскверни кровьюми.

Слава: Бысть явственню и оглашенню беззаконие всем христианом: темже якоже уведеша, стекошася вси купно в храм Господень святыи.

Богородичен: Тя рождшую предвечнаго от Отца Рожденнаго, ныне вернии молитвенницу предлагаем: Тоя молитвами Христе преклонен, благоуветлив буди рабом Твоим.

Катавасия: Седяи в славе, / на престоле Божества, / во облаце легце прииде / Иисус Пребожественный, / нетленною дланию, / и спасе зовущия: / слава Христе силе Твоей.

Песнь 5.

Ирмос: Ужасошася всяческая / о Божественной славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя, / мир подавающая.

Отверзаются днесь преддверия благодати, и упокоение ныне самое проображает Воскресение: сиче светоносне светлую Владычицу почитающе, и славнаго мученика.

Дарует тезоименитый дар, Бог, Феодора, возлюбившим явльшаго возлюбленнаго явление, преславных дел Творца, и Божественных сил Самоделеля содеваемого.

Ничтоже к мученику луцы и стрелы твоя враже человеческого спасения: и умерый бо живет, и возбну, и злодейством твоим противляйся, спасает всякаго православнаго.

Богородичен: Странное бяше прежде чудо Богоотроковице, страдальческими же свидетельствами прият веру несумненну, и веруемое присно пребывает чудимое, и верне покланяемое.

Иный.

Ирмос: Божиим светом Твоим, Блаже, / утреннюющих Ти души / любовью озари, молюся, / Тя ведети, Слове Божий, / Истиннаго Бога, / от мрака греховнаго взывающа.

Тогдашний убо архиерей весь ужаснувся, нечестиваго якоже уведеша совет, песньми всенощными Бога моляше, не презрети в конец людей жребия Его.

Но скорый воистинну помощник, во истине и теплоте призывающих, моления их не презре всякаго: но скорейшее им соделовает разрешение начинания.

Слава: От вышних помощник посылается яко скорее на землю, страстотерпец Феодор, и пастыреначальник является, разрешение научая беззаконнаго совета.

Богородичен: Никтоже притекая к Твоему Владычице, заступлению тепле, посрамится когда, но просит благодати, и дар приемлет к полезному скорейший прошения.

Катавасия: Ужасошася всяческая / о Божественной славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя, / мир подавающая.

Песнь 6.

Ирмос: Божественное сие и всечестное, / совершающе празднество, / богомудрии Богоматере, / приидите руками восплешим, / от Нея рождшагося Бога славим.

Поститися, Спасе, не могут друзи и сынове чертога Твоего: Тебе бо Жениха с Материю и с другом Твоим, учреждают предстояща и служат.

Отступи Бога спасающаго, отступи и от разума злоименитый, и кичением воста на веру: но вместо сего обрете великоименитаго.

Пострадав предста мудрший, и сотвори доблий тепльший, к мучителем бо бранию, и победою добре обучився, ниже умер отступи исправления.

Богородичен: Избавльшеся днесь, Владычице, беды душетленные, чудесем страстотерпца Твоего, по Твоему Божественному промыслению, благодать обоим возлагаем.

Иный.

Ирмос: Житейское море, воздвигаемое зря / напастей бурею, / к тихому пристанищу Твоему притек, вопию Ти: / возведи от тли живот мой, / Многомилостиве.

Странному ужасаяся видения твоего, архиерей противо рече: ты кто еси господи, глаголай мне? вразуми и научи, како обрящем скорейшую помощь?

Феодор рече: аз есмь явственен страстотерпец, и слыши: пшеницу сварив раздели людем, и тако спасутся от скверных брашен прелестника.

Слава: Коль велие чудо твое, и преславное твое заступление Феодоре! Темже дерзающе вси чисто к тебе прибегаем, и молимся, спаси рабы твоя.

Богородичен: Света жилище, и приятелище чистое Слова была еси, Отца благоволением, и к Тебе посещением Духа Святаго: темже мя просвети.

Катавасия: Божественное сие и всечестное, / совершающе празднество, / богомудрии Богоматере, / приидите руками восплешим, / от Нея рождшагося Бога славим.

Кондак, глас 8:

Веру Христову яко щит внутрь прием в сердце твоем, / противныя силы попрал еси многострадальче: / и венцем небесным венчался еси вечно Феодоре, / яко непобедимый.

Икос: На престоле света носимаго, благодарственно верою воспевает Тя, яко дарование Божественное даровал еси, добляго страданьми Феодора, в житии треблаженнаго, яко поборника суца истины: иже благочестивым помышлением стяжав Христа, державный, бысть победитель на лестнаго, яко непобедимый.

Синаксарий. Стихи:

Пищею колив питает Тирон град:

Пищу оскверненую учинив непотребну.

В сий день в субботу первую постов, еже коливами преславное чудо святаго и славнаго великомученика Феодора Тирона празднуем, еже име начало быти сице: Иулиану преступнику, по Константии Великаго Константина сыне скиптры царствия удержавшу, и от Христа во идолослужение преложшуся, гонение на христианы воздвизается превелие, яже же вкупе и не явленне. Отрекл убо злочестивый, еже мучити сурове, вкупе же и объявленно безчеловечне, тако искушати христианы: стыдяся же и обзирая, да не прилагаются множайшии, сокровенне некако осквернити сия льстивый и скверный умысли: отонудуже и соблюд, якоже наш язык Христов, первую святых постов седмицу наипаче очищается, и внимает Богу: епарха града призвав, повеле продаемья обычне снеди от среды отнести, другия же снеди предложити торжищу, сиречь хлеба и пития, от жертв его кровьми сия прежде смесивша, и в смешении осквернившя: яко да убо от поста сия купующии паче в чистоте осквернилися быша. Абие убо епарх на дело веде повеленое, и предлагает яже от жертв и кровей оскверненная брашна и пития во всем торжищи. Но всевидящее Божие око, запинаящее премудрыя в коварстве их, и о нас рабех Своих присно промышляющее, и гнусная преступника на нас коварства разруши. Градскому бо архиерею Евдоксию, аще и неправому и неправославному бывающу, посылает великаго Своего страсотерпца Феодора, от Тиронскаго чина, Тирона именуема. И убо яже, а не во сне тому представ, сице некако рече: елико скоро востав Христово собери стадо, и повелевай тверде, никомуже ничтоже на торжище предложенных купити: жертв бо кровьми сия осквернишася от нечестиваго царя. Сему же недоумевающу, и вопрошающу, и како бы удобно было сие, недостаток в дому имущим, не от предложенных в торжище купити? Святый, колива дав, глаголет им, недостаток утешити. Сему же недоумевающу, и неразумевашу, и что была бы сия колива, вопрошающу, великий Феодор глаголет: вареную пшеницу: сице бо мы во Евхаитех глаголати обыкохом. Испытая же патриарх: кто убо есть сей о христоименитых людех промышляй? Святый же паки, Христов мученик Феодор, рече: от Него помощник вам ныне послан есмь. Востав убо абие патриарх, и множеству возвестив виденая, и тако содеяв, Христово стадо соблюде невредимо от врага и преступника коварства. Он же свое ловительство узрев обличено бывшо, и ничтоже совершившо, и довольне постыдився, предложитися и паки обычным на торжище продажным повеле. Христовы убо

людие, седмице уже совершившейся благодарение отдающе Благодетелю и мученику, в сию субботу коливками ему память радуящегося сотвориша. Оттоле убо вернии даже и до ныне чудо обновляюще, да не забвено толикое дело мученика временем будет, великаго Феодора коливками почитаем. Сего же великаго злочестивый Вринга при Максимиане умучи, изнурена прежде: таже храм богини оных сжегша, и убогим красоту ея раздееивша. Неким же и в словеса ему пришедшим, и преложитися хотящим ему, и совет творящим не претерпе. Много убо пострадав, последи печи велицей разжене бывши, в ню вметається, ничтоже от нея пострадав, посреде ея дух Богу предаде. Того молитвами Христе Боже помилуй и спаси нас, аминь.

Песнь 7:

Ирмос: Не послужиша твари богомудрии / паче Создавшаго, / но огненное прещение мужески поправше, / радовахуся поюще: / препетый отец Господь и Бог благословен еси.

Закону рекл еси не лежати праведником Твоим, Праведный Владыко: темже Мати Твоя, и многочудный сей раб Твой, светлостию памяти сих днесь законы разоряют пощения.

Коль сладкое, и великое, и радостное нынешнее торжество! Еже мучеников нам доблейший и превелий ныне вообрази, едином чудесем от нечистых чистыя люди Христовы совершив.

К змием лютым сопротивльшагося, и возмогшаго на душетленного же и оскверняющаго одушевленная телеса, венчаим победными песньми, и венцев похвалами.

Богородичен: Родоначалник убо проуведев душетленное брашно не убеже: Твои же вернии людие от Твоего мученика преднаучившися, и избегше всепагубныя пищи, с сим Владычице, спасительная Тебе жрут.

Иный.

Ирмос: Росодательну убо печь содела ангел / преподобным отроком, / халдеи же опаляющее веление Божие, / мучителя увеща вопити: / благословен еси, Боже отец наших.

Росодавец печали, и распаления облак явился еси преславне, и спасл еси от печи мучительския, зовущия вся верныя: благословен еси Боже отец наших.

Царю пребеззаконнейший посрамися, и да заградятся уста твоя, поучающаяся на нас беззаконному совету: разруши бо твою крепость царствуй Царь и всех Господь.

Слава: Иулиане безумне, сердце твое все злобы исполнися, обавається же от премудраго Бога нашего, излившееся лестно на нас, вопиющих к Нему: благодать подаваеши нам.

Богородичен: Паче слова Твое бысть зачатие, и паче ума Рождество Твое Всенепорочная: Бога бо родила еси плотию, спасшаго вся от тления, Благословенная. Темже ныне Богородице Тя славим.

Катавасия: Не послужиша твари богомудрии / паче Создавшаго, / но огненное прещение мужески поправше, / радовахуся поюще: / препетый отцев Господь и Бог благословен еси.

Песнь 8.

Ирмос: Избавителю всех Всесильне, / посреде пламене благочествовавший, / снизшед оросил еси, / и научил еси пети: / вся дела благословите, пойте Господа.

Радости Рождеством исполнившая небесная и земная, временным сетованием благодать благовременную подает венчнику, сплещущи светло празднственная.

Субботствуим человецы днесь, от трудов вчерашних почивше, за Благословившаго настоящий день упокоением, и ныне торжеством мученика.

Воистинну сия первая в субботах, и суббот бы глаголалася суббота: мученическая же благодати и силы Божественныя исполнена, спасения великаго воспоминание.

Царя Бога чистыми брашны, царствия беззаконнаго сквернения, чистый упраздни, и преславным образом чудодействия святую седмицу освяти.

Богородичен: Извещает Твое Отроковице таинство, мучеников усердная смерть: яко бо Богу веровавше рождшемуся, аще и страсть волею претерпе, самех себе доблии пожроша.

Иный.

Ирмос: Из пламене преподобным росу источил еси, / и праведнаго жертву водою попалил еси: / вся бо твориши, Христе, токмо еже хотети. / Тя превозносим во вся веки.

Из пламене яко избавился еси мучениче Феодоре, Божественною силою: сице и ныне нас спасл еси сам предстательством божественным твоим, беззаконнаго совета злокозненнаго.

Вечер водворися плач рабом твоим, от лукаваго ловительства супостата нашего: но во утрие радость возсия, мучениче терпеливоносче, теплою твоею помощью.

Слава: Избавителя тя обретше, в беды мы впадше, и избавителя козни вражия, мучениче Христов страстотерпче Феодоре, ты славословим во вся веки.

Богородичен: Недоумевает ум человеческий Твоего Рождества Чистая, таинство изрещи: и сего ради Тя верою благочестно, яко Богородицу почитаем, и славословим во вся веки.

Катавасия: Отроки благочестивыя в пещи / Рождество Богородичо спасло есть, / тогда убо образуемое: / ныне же действуемое, / вселенную всю воздвизает пети Тебе: / Господа пойте дела / и превозносите Его во вся веки.

Песнь 9.

Ирмос: Воистинну Богородицу / тя исповедуем Спасеннии Тобою, / Дево Чистая, / с безплотными лики / Тя величающе.

Стекается множество отсюда, в сень сведения, и живущую благодать, предпросиявшего в славе всех мучеников, со Владычицею всех величаем.

Мужайся Христова Церковь, и державствуй всеу борющимися: Христовы бо друзи и предстоящи о тебе пекутся и отстоящи якоже доблии, Емуже совершаеши благодарственная.

Возмневшася древле умрети, вещи показывают жити и по кончине, и веры паки предстательствовати с равною ревностию. Еюже богатящися Благодетеля величаем.

Богородичен: Яко Божественную Тя печать песньми, запечатанную Божию книгу налагаю нося, и собираю похвалы в Тебе Дево: сице прославляя наипаче Твоего мученика.

Иный.

Ирмос: Бога человеком невозможно видети, / на Негоже не смеют чини ангельстии взирати: / Тобою же Всечистая, явися человеком / Слово воплощено, / Егоже величающе, / с небесными вои Тя ублажаем.

Добре явился еси поборник преславне, и державное заступление нам чтущим твою честную и вечную память ныне, и твоих страдальчеств исправления, и бывшее в нас Божественное заступление.

Твое всеблаженне чудо Феодоре совершенное, святыми тучами поется, на весь мир блаженне: темже и летно собирающися, славу возсылаем Христу, тебе прославльшему.

Слава: Зря любовь восхваляющих тя мучениче Христов, благодать воздарствуй вящшую: и веру ведый елика есть преславне, не престай молитвенниче теплейший мучениче, и ходатай к Богу нашему являйся.

Богородичен: Пети Дево, Тя не престаем, помощницу, покров, скорое заступление, и предстательницу нашу непостыдную: соблюди Твоя рабы, всякаго озлобления, всякия козни лукаваго свободяющи присно.

Катавасия: Всяк земнородный / да възиграется Духом просвещаемь, / да торжествует же безплотных умов естество, / почитающее священное торжество Богоматере, / и да вопиет: / радуйся всеблаженная / Богородице, Чистая Приснодево.

Ексапостиларий:

Подобен: Со ученики:

Венченосче святе, предстояй со ангелы Христову ныне престолу, и света оттуду исполняяйся страстносче, мир мирови непрестанно исходатайствуй, и нам спасение, благочестно светоносную память твою совершающим, Феодоре всебогате, мучениче преукрашенне.

Богородичен: Во чреве Твоем Господь, погибающий мир от тления призвати восхотев, якоже ведяше, вселися Богородице. Спасение убо вси обретше, возопиим Тебе ангелово, еже радуйся Всепетая, во всех женах благословенная: ибо радость породила еси всей вселенней.

На хвалитех поставим стихи 4, глас 1.

Подобен: Небесных чинов:

Мужа изрядна вышняго воинствословия вернии, / яко терпеливаго оружника нашего благочестия, / согласно сошедшеся, / песньми таинственными восхвалим, глаголюще: / досточудне мучениче Иисусов, / молися о чтущих тя.

Тезоименитым твоим званием, / даре Божий воистинну, / скорбящим всем утешение подался еси Феодоре треблаженне, / всякий бо к твоему приближаяся храму воистинну, / с веселием приемля воздаяния чудес твоих, почитает Христа.

Благочестия богатство, и светлость, страдальческими подвиги, / себе сокровиществовав, / всю крепость твою дар приятный Богу принесл еси, / исполняя в подвизех со тщанием / благодарованное твое призывание.

Всесветлым торжеством Божественнаго мученика, / напитаимся вси, и верно возвеселимся празднолюбцы, / почитающе светлое празднество его скончания, / песненно воспевающе Иисуса, / прославившаго память его.

Слава, глас 6:

Священия дар, / и богатство Божественныя жизни, / показался еси миру Феодоре: / Христос бо мудре твою память прослави, / в нюже согласно вернии радуящися, / поем подвиги болезней твоих.

И ныне: Богородичен, глас тойже:

Богородице, Ты еси лоза истинная, / возрастившая нам Плод живота, / Тебе молимся, молися Владычице, / со стратотерпцем, и всеми святыми, / помиловатися душам нашим.

На стиховне стихиры святаго, глас 4. Самогласны:

Ликут соборы мучеников радостно, / ныне в храме твоем, стратотерпче Феодоре, / и ангельстии чинове, / страдальчества плещут терпения твоего: / и сам венцедавец Христос предстоит, / богатотворная дарования твоим певцем десницею подая, / Егоже возжелев взыскал еси, / и обрет беседовал еси, Егоже желал еси: / Егоже моли, спасти и просветити души наша.

Стих: Праведник яко финикс процветет:

Чистый и непорочный пост пришедый ныне к нам, / мученических чудес совершенство совведе: / постом бо душевныя скверны очистим, / и мученическими знаменьями, / и страдальчества, / доблественно на страсти вмужимся: / отонудуже и священнаго воздержания благодатию просвещающа, / и чудодейства Феодора мученика, / ко Христу утверждаемъ верою, просяще Его, / спасение подати душам нашим.

Стих: Насаждени в дому Господни, во дворех Бога нашего:

Мученическим твоим дерзновением к Богу Феодоре, / отступническую на веру Христову кознь суетну сотворил еси, / поборник благочестующим был еси людем, / предстанием ужасным, скверных брашен жертвы идольскими их избавль. / Темже ты яко идолов потребителя, / и яко стада Христова спасителя и хранителя, / и предстателя нашего благопослушливаго, / чтуще в песнях молим, очищению / и просвещению / тобою дароватися душам нашим.

Слава, глас 8:

Страдальческим мужеством / благочестно вооружився страсотерпче Христов, / и словесное служение тайно поборая силою Его, / идолов нечестие и мучителей прещение немощно показал еси, / презирая мучения и временный огонь. / Но, о Божественных даров и вещь, и имя! / От всякаго обстояния молитвою твоею / спасай совершающия память твою.

И ныне, Богородичен:

Владычице, прими молитвы раб Твоих / и избави нас / от всякия нужды и печали.

И прочее последование Утрени. Совокупляем и час 1.

НА ЛИТУРГИИ

Изобразительная, и от канона святого песнь 3 и 6.

1. **Первее** в Евины уши пошептавый лестно, и Адама тоуже прельстивый лестно, той и ныне яд злобы к лести излия.
2. **Лестца** имяше на него, питаше неистовство противу правоживущим, время възскаше правое, вонъже мерзость сотворити поучашеся пребеззаконнейший.
3. **Дней** начаток святых наста постов: в нихже всякий христианин самага себе воздержанием многим очистив, всех ошаяся.
4. **Надеждо** миру державная, покрове и предстательство Всесвятая Дево, не презри Благая моления рабов, от любве Тя присно ублажающих.
5. **Странному** ужасаяся видения твоего, архиерей противо рече: ты кто еси господи, глаголай мне? вразуми и научи, како обрящем скорейшую помощь?
6. **Феодор** рече: аз есмь явственно страсготерпец, и слыши: пшеницу сварив раздели людем, и тако спасутся от скверных брашен прелестника.
7. **Коль** велие чудо твое, и преславное твое заступление Феодоре! Темже держающе вси чисто к тебе прибегаем, и молимся, спаси рабы твоя.
8. **Света** жилище, и приятелище чистое Слова была еси, Отца благоволением, и к Тебе посещением Духа Святаго: темже мя просвети.

Тропарь святого Феодора глас 2:

Велия веры исправления, / во источнице пламене, / яко на воде упокоения, / святой мученик Феодор радовашеся: / огнем бо всесожжегся, яко хлеб сладкий Троице принесесе. / Того молитвами / Христе Боже спаси души наша.

Кондак, глас 8:

Веру Христову яко щит внутрь приим в сердца твоем, / противныя силы попрали еси многострадальче, / и венцем небесным венчался еси вечно Феодоре, / яко непобедимый.

Прокимен глас 7: Возвеселится праведник о Господе, и уповает на Него:

Стих: Услыши Боже глас мой, внемда молити ми ся к Тебе.

Апостол дне, ко Евреем, зачало 303. [Евр. 1, 1 – 12.]

Многочастнѣ и многообразнѣ древле бѣ главый отцѣмъ во прѣрѣцѣхъ, въ послѣдокъ днѣи сѣхъ гла намъ въ сѣхъ, егѣже положи наследника всѣмъ, иже и всѣхъ сотвори. Иже сѣи сѣлнѣ славы и образъ вѣпостѣси егѣ, носѣ же всѣхъ ескал

глаголюмъ силы своеѧ, собоу ѡчищеніе сотворивъ грѣхѡвъ нашихъ, сѣде ѡ деснѡю прѣстола величествіа на высокихъ, толѡкѡ лѣшій бывъ аггловъ, елико преславише паче ихъ наследства имѧ. **К**омъ во рече когда ѿ аггль: снъ мой еси ты, азъ днесь родихъ тѧ; **И** паки: азъ вѣдѡ емѡ во оца, и тои вѣдетъ мнѣ въ снѧ; егда же паки вводитъ первороднаго во всеиеню, глетъ: и да поклонатса емѡ вси аггли бжїи. **И** ко аггломъ ѡубо глетъ: твораи агглы своѧ дѣхи и слзи своѧ ѡгнь палачи. **К**ъ снѡ же: прѣтолъ твои, бже, въ вѣкѡ вѣка: жезлъ правости жезлъ црѣтвїа твоегѡ: возлюбилъ еси правдѡ и возненавидѣлъ еси беззаконїе: сегѡ ради помаза тѧ, бже, бгѡ твои еіемъ радости паче причастникъ твоихъ. **И** (паки): въ началѣ ты, гди, землю ѡсновилъ еси, и дѣла рѡкѡ твоєю сѣть небеса: тѧ погивнѡтъ, ты же превываеши: и всѧ, ѡкоже рїза, ѡветшаютъ, и ѡко ѡдеждѡ свїеши ихъ, и измѣнатса: ты же тожде еси, и лѣта твоѧ не ѡскѡдѣютъ.

Святому Апостол, к Тимофею, зачало 292. [2 Тим. 2, 1 – 10.]

Чадо Тимофее, **Т**ы ѡубо, чадо мое, возмогаи во влѣти, ѡже ѡ хрїтѣ іисѣ, и ѡже слышалъ еси ѿ мене многими свидѣтели, сїѧ предѡждь вѣрнымъ человекѡмъ, ѡже доволни вѣдѡтъ и иныхъ надрѣти. **Т**ы ѡубо слопостражди ѡко добръ вѡннъ іисѣ хрїтовъ. **Н**иктоже (во) вѡннъ вывал ѡблзѡдетса кѡплми житѣйскими, да воеводѣ ѡгѡденъ вѣдетъ. **А**ще же и постраждетъ кто, не вѣнчѡетса, аще не законнѡ мѣченъ вѣдетъ. **Т**рѡждающемѡса дѣлателю прѣжде подобѡетъ ѿ плода вѡсїти. **Р**аздѣи, ѡже глаголю: да дастъ ѡубо тебѣ гдѡ раздѣи ѡ всеиъ. **П**оминѡи (гдѡ) іисѡ хрїта востѡвшаго ѿ мѣртвыхъ, ѿ сѣмене дѣдова, по блговѣствованїю моему, въ неже слопстраждѡ даже до ѡузъ, ѡко слодѣи: но слово бжїе не вѡжетса. **С**егѡ ради всѧ терпиѡ избранныхъ ради, да и тїи спнїе ѡлучатъ еже ѡ хрїтѣ іисѣ, со славою вѣчною.

Аллилуиа, глас 4: Праведник яко финикс процветет, яко кедр иже в Ливане умножится.

Стих: Насаждени в дому Господни, во деворех дому Бога нашего процветут.

Евангелие от Марка, зачало 10. [Мк. 2, 23 – 3, 5.]

Во время оно: мимоходити емѡ въ сѡбвѡты сквозѣ сѣлнїа, и начаши ѡучнїцы егѡ пѣть творити, востерзѡюще клѡсы. **И** фарїсеѣ глаголахѡ емѡ: виждь, что творѡтъ въ сѡбвѡты, егѡже не достѡитъ; **И** тои глаше имъ: нѣсте ли

николіже чий, что сотвори двѣдѣ, егда требованіе имѣ и взалка самъ и иже съ нимъ; какъ видѣ въ домъ вѣтій при авіаѳарѣ архіерей, и хлѣбы предложеніа снѣдѣ, ихже не достобаше ѣсти токми іереемъ, и даде и сѣцыми съ нимъ; **И** глаше имъ: сѣвѣота чловека ради бысть, а не чловекъ сѣвѣоты ради: тѣмже господь есть снъ члвчскій и сѣвѣотѣ. **И** видѣ пакы въ соннице: и вѣ тамъ чловекъ, сѣхъ имый рѣкъ. **И** назирахъ егò, аще въ сѣвѣоты ищѣлиятъ егò, да нанъ возглагòютъ. **И** гла чловекъ сѣхъ имѣемъ рѣкъ: стани посреде. **И** гла имъ: достобитъ ли въ сѣвѣоты добрò творити, или зло творити; дѣшъ спасти, или погубити; **О**ни же молчашъ. **И** возрѣвъ на нихъ со гнѣвомъ, скорвѣ ѡ ѡкаменѣніи сердець ихъ, гла чловекъ: простри рѣкъ твою. **И** простре: и оутвердѣса рѣка егò цѣла ѣкѡ дрѣга.

И святаго, от Иоанна, зачало 52. [Ин. 15, 17 – 16, 2.]

Рече Господь Своимъ ученикомъ: Сіѣ заповѣдаю вамъ, да любите дрѣгъ дрѣга. **А**ще мѣръ васъ ненавидятъ, вѣдите, ѣкѡ менѣ прежде васъ возненавидѣ: аще ѡ мѣра вы есте были, мѣръ ѡвѣ свое любили бы: ѣкоже ѡ мѣра не есте, но азъ избрѣхъ вы ѡ мѣра, сегò ради ненавидятъ васъ мѣръ. **П**оминайте слово, еже азъ рѣхъ вамъ: несть рабъ болѣй гòспода своего: аще менѣ изгнаша, и васъ ижденѣтъ: аще слово мое соблюдоша, и ваше соблюдетъ: но сіѣ всѣ творятъ вамъ за имя мое, ѣкѡ не вѣдаютъ послѣваго мѣ. **А**ще не выхъ пришѣлъ и глаголю имъ, грѣхъ не быша имѣли: нѣ же вины не имѣтъ ѡ грѣсѣ своемъ: ненавидѣи менѣ, и оца моего ненавидятъ: аще дѣлъ не выхъ сотворилъ въ нихъ, ихже имъ никтоже сотвори, грѣхъ не быша имѣли: нѣ же и видѣша, и возненавидѣша менѣ и оца моего: но да сѣдетса слово, писанное въ законѣ ихъ, ѣкѡ возненавидѣша мѣ тѣне. **Е**гда же прїидетъ оутѣшитель, егòже азъ послю вамъ ѡ оца, дѣхъ истины, иже ѡ оца исхòдитъ, той свидѣтельствуетъ ѡ мнѣ: и вы же свидѣствуете, ѣкѡ искони со мною есте. **С**іѣ глахъ вамъ, да не соблазнитѣса. **Ѡ** сонницѣ ижденѣтъ вы: но прїидетъ часъ, да всѣкъ, иже оубѣетъ вы, возмнитса слѣбѣ приносити вѣ:

Причащен: В память вечную:

На трапезе чтемъ слово похвальное о святемъ Феодоре, святаго Григоріа Нисскаго. **И** ядимъ бобъ обваренный, с маслинами белыми и черными. **П**ричащаемся же и варения с масломъ прилучившагося, и колива: вина же

испиваем по красоволю, ради святого. Сие же прияхом от лавры преподобнаго отца нашего Саввы, и от богоноснаго отца нашего Евфимиа.

Ведати подобает, яко дважды прияхом ясти рыбы в сей Великий пост, в праздник Благовещения, и Цветоносия.